



# **SLUŽBENI GLASNIK**

## **OPĆINE SANSKI MOST**

**Godina XXII Broj 12/22 Sanski Most, 28. oktobra, 2022. god.**

Izdavač:  
Općinsko vijeće  
Sanski Most

Redakcioni odbor:  
Evelin Rizvanović

Odgovorni urednik:  
Edisa Hodžić

Pretplata: 50 KM

# S A D R Ź A J

Službeni glasnik općine Sanski Most  
Broj: 12/22    Godina XXII    28. oktobra 2022. god.

Odluka o stavljanju van snage Odluke o izmjeni i dopuni Odluke o plaćama i naknadama zaposlenika u Općinskim organima općine Sanski Most .....	3
Odluka o usvajanju vizije razvoja mjesnih zajednica na području općine Sanski Most .....	4
Rješenje o imenovanju Općinskog pravobranioca općine Sanski Most .....	5
Zaključak o usvajanju Nacrta Odluke o komunalnim taksama i tarifi komunalnih taksa .....	6
Zaključak o primanju k znanju Informacije o ostvarenju godišnjeg plana implementacije Strategije lokalnog razvoja općine Sanski Most za 2021.godinu- Izvještaj o razvoju.....	18
Platforma za mir .....	19
Plan aktivnosti za implementaciju Platforme za mir 2022/2023. godinu .....	22
Akti predsjedavajuće Općinskog vijeća Sanski Most	
Rješenje o osnivanju Kolegija Općinskog vijeća .....	23
Rješenje o izmjeni Rješenja o osnivanju Kolegija Općinskog vijeća .....	24

Na osnovu člana 24. Statuta općine Sanski Most ("Službeni glasnik općine Sanski Most", br.4/08,5/08,5/09,2/10, 9/11), Općinsko vijeće na 19. sjednici održanoj dana 27.10.2022.godine, donosi :

## **ODLUKU**

### **o stavljanju van snage Odluke o izmjeni i dopuni Odluke o plaćama i naknadama zaposlenika u Općinskim organima općine Sanski Most**

#### **Član 1.**

Ovom Odlukom stavlja se van snage Odluka o izmjeni i dopuni Odluke o plaćama i naknadama zaposlenika u Općinskim organima općine Sanski Most, broj: 01-02-173/22 od 11.05.2022.godine („Službeni glasnik općine Sanski Most“, br. 07/22).

#### **Član 2.**

Ova Odluka stupa na snagu narednog dana od dana objave u Službenom glasniku općine Sanski Most, a primjenjivaće se od 01.11.2022.godine.

Broj:01-02-325/22  
Datum:28.10.2022. godine

Predsjedavajuća Općinskog vijeća  
dr. Nada Elijaš, s.r.

Na osnovu člana 8. i člana 13. Zakona o principima lokalne samouprave ("Službene novine Federacije BiH", broj 49/06), člana 12. Zakona o lokalnoj samoupravi Unsko-sanskog kantona ("Službeni glasnik USK", br. 8/11) i člana 24. Statuta Općine Sanski Most ("Službeni glasnik općine Sanski Most", broj 4/08, 5/08, 5/09, 2/10, 9/11), Općinsko vijeće Sanski Most na 19. sjednici održanoj dana 27.10.2022. godine, donijelo je

## **ODLUKU O USVAJANJU VIZIJE RAZVOJA MJESNIH ZAJEDNICA U OPĆINI SANSKI MOST**

### **Član 1.**

Ovom Odlukom usvaja se Vizija razvoja Mjesnih zajednica u Općini Sanski Most.

### **Član 2.**

Vizija razvoja predstavlja okvirni model razvoja ljudskih, tehničkih i administrativnih kapaciteta organa svih Mjesnih zajednica na području Općine Sanski Most, u svrhu unaprijeđenja učešća građana u procesu donošenja odluka u lokalnoj zajednici.

Tekst Vizije razvoja je sastavni dio ove Odluke.

### **Član 3.**

Općinski načelnik će u saradnji sa Službom za opću upravu u društvene djelatnosti najkasnije 90 dana od dana usvajanja ove Vizije izraditi operativni plan implementacije ove Vizije za period 2023.-2025. godina, te će se isti ažurirati svake godine za naredni trogodišnji period.

### **Član 4.**

Ova odluka stupa na snagu osam (8) dana od dana objave u Službenom glasniku Općine Sanski Most.

Broj:01-02-326/22

Predsjedavajuća Općinskog vijeća

Sanski Most, 28.10.2022.godine

dr. Nada Elijaš, s.r.

Na osnovu člana 45. i 47. Zakona o pravobranilaštvu Unsko-sanskog kantona („Službeni glasnik USK“, broj: 20/04 i 8/17) i člana 24. Statuta općine Sanski Most („Službeni glasnik općine Sanski Most“ broj: 04/08, 05/08,05/09,02/10 i 09/11), člana 121. stav (2) Poslovnika o radu Općinskog vijeća Sanski Most („Službeni glasnik općine Sanski Most“ broj: 4/17, 7/20, 7/21, 6/22, 10/22 i 11/22) Općinsko vijeće Sanski Most, na prijedlog Općinskog načelnika, na 19. sjednici održanoj dana 27.10.2022.godine, donijelo je

**R J E Š E N J E**  
**o imenovanju Općinskog pravobranioca**  
**općine Sanski Most**

Član 1.

SABAHUDIN PAUNOVIĆ, dipl. pravnik sa položenim pravosudnim ispitom imenuje se za Općinskog pravobranioca općine Sanski Most.

Član 2.

Mandat općinskog pravobranioca traje četiri godine.

Član 3.

Prije stupanja na dužnost Općinski pravobranioac daje svečanu izjavu pred Općinskim vijećem.

Član 4.

Općinski pravobranioac preuzima dužnost 28.12.2022.godine.

Član 5.

Rješenje stupa na snagu danom donošenja i bit će objavljeno u " Službenom glasniku Općine Sanski Most".

Broj: 01-04-327/22  
Datum:28.10.2022.god.

PREDSJEDAVAJUĆA OPĆINSKOG VIJEĆA  
dr. Nada Elijaš, s.r.

Na osnovu člana 24. Statuta općine Sanski Most ("Službeni glasnik općine Sanski Most", broj: 4/08, 5/08, 5/09, 2/10 i 9/11) i člana 124. Poslovnika o radu Općinskog vijeća Sanski Most ("Službeni glasnik općine Sanski Most", broj: 4/17,7/20, 06/22, 10/22 i 11/22) Općinsko vijeće Sanski Most, na 19. sjednici održanoj dana 27.10.2022.godine, razmatralo je nacrt Odluke o komunalnim taksama i Tarifi komunalnih taksa, te nakon rasprave donijelo:

## ZAKLJUČAK

### Član 1.

Usvaja se nacrt Odluke o komunalnim taksama i Tarifi komunalnih taksa i isti se upućuje na javnu raspravu u trajanju od 30 dana od dana objavljivanja u Službenom glasniku općine Sanski Most.

### Član 2.

Javnu raspravu će organizirati i voditi Služba za razvoj, poduzetništvo i resurse općine Sanski Most.

### Član 3.

Subjekti javne rasprave su vijećnici, radna tijela Općinskog vijeća, klubovi vijećnika, Općinski načelnik sa svojim službama, javne ustanove i javna preduzeća čiji je osnivač Općinsko vijeće, drugi organi i organizacije, građani i ostala zainteresirana lica.

### Član 4.

Služba za razvoj, poduzetništvo i resurse općine Sanski Most će razmotriti mišljenja, primjedbe, prijedloge i sugestije pristigle u javnoj raspravi i sačiniti izvještaj o provedenoj javnoj raspravi, utvrditi prijedlog Odluke o komunalnim taksama i Tarifi komunalnih taksa i uputiti ga Općinskom vijeću na razmatranje i usvajanje.

### Član 5.

Ovaj zaključak stupa na snagu narednog dana od dana objavljivanja u "Službenom glasniku Općine Sanski Most".

Broj: 01-02-328/22  
Datum:28.10.2022.godine

**PREDSJEDAVAJUĆA**  
**OPĆINSKOG VIJEĆA**  
dr.Nada Elijaš, s.r.

## NACRT

Na osnovu člana 8. i 13. stav (2) tačka 4.) Zakona o principima lokalne samouprave Federacije Bosne i Hercegovine ("Službene novine FBiH", broj: 49/06 i 51/09), člana 12. stav (3) tačka nj.) i 21. stav (1) tačka č) Zakona o lokalnoj samoupravi USK-a ("Službeni glasnik USK", broj: 8/11), člana 13. stav (1) tačka c.) i stav (4) Zakona o pripadnosti javnih prihoda u Federaciji BiH ("Službene novine Federacije BiH", broj: 22/06,43/08, 22/09, 35/14, 94/15 i 12/22) i člana 24. Statuta općine Sanski Most ("Službeni glasnik općine Sanski Most", broj: 4/08, 5/08, 5/09, 2/10, 9/11), Općinsko vijeće općine Sanski Most, na prijedlog Općinskog načelnika, na \_\_ redovnoj sjednici održanoj dana \_\_\_\_\_2022. godine, donijelo je:

### ODLUKU o komunalnim taksama i tarifi komunalnih taksa

#### I OPĆE ODREDBE

##### Član 1.

Ovom Odlukom propisuju se komunalne takse, visina i način utvrđivanja i plaćanja komunalne takse, povrat komunalne takse, oslobađanje od plaćanja komunalne takse, te tarife komunalnih taksa na području općine Sanski Most (u daljem tekstu: Općina).

##### Član 2.

Komunalne takse se plaćaju za korištenje predmeta, prostora ili pružanja usluga za čije je korištenje propisano plaćanje komunalne takse.

##### Član 3.

Komunalne takse (u daljem tekstu: takse) plaćaju se za:

- a) istaknutu firmu,
- b) priređivanje zabavnih igara i igara na sreću,
- c) organizovanje i držanje žive muzike u ugostiteljskim i drugim objektima,
- d) korištenje uređaja za pružanje usluga mobilne telefonije,
- e) korištenje elektro energetske objekata kojima se vrši prenos električne energije,
- f) korištenje podzemnih i nadzemnih kablovskih instalacija u svrhu prenosa signala, podataka, električne energije i slično,
- g) korištenje uređaja za pružanje usluga kablovske televizije i bežičnog interneta

##### Član 4.

- (1) Pod istaknutom firmom u smislu ove Odluke podrazumijeva se ime pod kojim je registrirano pravno ili fizičko lice koje posluje.
- (2) Pod priređivanjem zabavnih igara i igara na sreću /posebnih i klasičnih/, u smislu ove Odluke podrazumijeva se priređivanje zabavnih igara putem predmeta, aparata i drugih sredstava gdje je dobitak isključivo u određenom broju igara, priređivanje igara putem elektronskih ili mehaničkih aparata koji tokom igre omogućuju igraču dobitak u novcu ili žetonima koji su naplativi u novcu, priređivanje igre na automatima u posebnim klubovima (slot mašine) s mogućnošću višestrukog uloga i dobitka, priređivanje igre klađenja na sportske rezultate i druge neizvjesne događaje.

- (3) Pod organizovanjem i držanjem muzike u ugostiteljskim objektima otvorenog i zatvorenog tipa u smislu ove Odluke podrazumijeva se povremeno ili svakodnevno izvođenje muzičkog programa uz pružanje ugostiteljskih usluga.
- (4) Pod korištenjem uređaja za pružanje mobilne telefonije podrazumijeva se korištenje sljedećih uređaja i opreme:
- a) Bazne stanice mobilne telefonije
  - b) Mikro bazne stanice mobilne telefonije
  - c) predajnici (pasivni repetitori)
  - d) antene i stubovi
- (5) Pod korištenjem uređaja/objekata kojima se vrši prenos električne energije u smislu ove Odluke podrazumijevaju se sljedeći uređaji i opreme:
- a) trafostanice 110(20/35) kV,
  - b) trafostanice 110/20/10 kV
  - c) trafostanice 35/(20) 10/0,4 kV,
  - d) trafostanice 10(20) 0,4 kV
  - e) stubne trafostanice
- (6) Pod korištenjem podzemnih i nadzemnih kablovskih instalacija u svrhu prenosa signala, podataka, električne energije i slično podrazumijeva se korištenje elektro-energetskih, telekomunikacijskih i kablovskih instalacija u svrhu prenosa telefonskog, TV i internet signala, prenosa podataka, električne energije i sl.
- (7) Pod korištenjem uređaja za pružanje usluga kablovske televizije i bežičnog interneta podrazumijeva se prijenos Radio i TV signala kablovskim putem do krajnjeg korisnika i korištenje sljedećih uređaja i opreme:
- a) baznih,
  - b) mikrobaznih stanica,
  - c) predajnika (pasivni repetitori),
  - d) antena i stubova.

#### Član 5.

- (1) Obveznik takse je pravno i fizičko lice koje koristi predmet, prostor ili uslugu za čije je korištenje propisano plaćanje komunalne takse.
- (2) Ako za istu taksu postoje dva ili više obveznika njihova obaveza je solidarna.

#### Član 6.

Visina takse utvrđuje se tarifom komunalnih taksa (u daljem tekstu:tarifa), koja je sastavni dio ove Odluke.

#### Član 7.

- (1) Taksena obaveza nastaje u trenutku kada se počinje koristiti predmet, prostor ili usluga za čije korištenje je propisano plaćanje takse.
- (2) Taksa se plaća na način i u rokovima propisanim ovom Odlukom.



(3) Ako se u postupku ne može pouzdano utvrditi vrijeme nastanka obaveze uplate takse, vrijeme nastanka obaveze po ovom osnovu utvrđuje se rješenjem kojim se utvrđuje obaveza i iznos takse.

#### Član 8.

Prihodi od taksa uplaćuju se na račun javnih prihoda budžeta općine Sanski Most.

## II PODNOŠENJE PRIJAVE, RAZREZ I NAPLATA TAKSE

#### Član 9.

- (1) Komunalnu taksu iz člana 3. stav 1. tačka a) i b) kontroliše i naplaćuje Porezna uprava FBiH-Ispostava Sanski Most, u skladu sa Zakonom o poreznoj upravi FBiH ("Službene novine FBiH, br.33/02, 28/04, 57/09, 40/10, 27/12, 7/13, 71/14, 91/15 i 44/22) i ovom Odlukom.
- (2) Komunalnu taksu iz člana 3. stav 1. tačka c), d), e), f) i g), rješenjem utvrđuje nadležna Služba za razvoj, poduzetništvo i resurse Općine Sanski Most, a naplaćuje, kontroliše i prati izvršenje naplate Služba za finansije, trezor i zajedničke poslove Općine Sanski Most. Praćenje izvršenja naplate takse uključuje i izdavanje odgovarajućih pisanih opomena.
- (3) Obveznik takse dužan je Poreznoj upravi-Ispostava Sanski Most, podnijeti prijavu za razrez takse za taksu iz člana 3. stav 1., tačka a) i b) na obrascima čiji sadržaj propisuje Općinski načelnik.
- (4) Postupak koji prethodi donošenju rješenja kojim se utvrđuje obveza plaćanja takse iz člana 3. stav (1.) tačka c.), d.), e.), f.) i g.) pokreće se na osnovu zahtjeva stranke ili po službenoj dužnosti, a prema odredbama Zakona o upravnom postupku Federacije Bosne i Hercegovine.
- (5) Rješenje iz stava (4.) ovog člana pored elemenata propisanih Zakonom o upravnom postupku Federacije Bosne i Hercegovine, sadrži i sljedeće elemente:
  - a) Odredbu kojom se utvrđuje da je određeno fizičko ili pravno lice korisnik predmeta po osnovu kojeg se naplaćuje taksa. Ako se postupak pokreće po zahtjevu stranke ova odredba sadrži "davanje" ili "odbijanje zahtjeva",
  - b) Osnovne podatke o korisniku, odnosno obvezniku uplate takse,
  - c) Osnovne podatke o predmetu po osnovu kojeg se naplaćuje taksa. Podaci o predmetu uključujući površinu, dužinu i druge elemente od značaja za utvrđivanje iznosa takse,
  - d) Datum nastanka obaveze, ako se nastanak obaveze ne može utvrditi na osnovu relevantnih podataka,
  - e) Iznos takse, uključujući i period za koji se utvrđuje iznos takse. Ako se taksa utvrđuje u periodičnim iznosima rješenjem se utvrđuje i ukupni godišnji iznos,
  - f) Rok za uplatu takse i osnovne podatke o načinu uplate. Osnovni podaci o načinu uplate uključuju i broj računa na koji se taksa uplaćuje, vrstu prihoda i ostale podatke od značaja za finasijsko poslovanje,
  - g) Nadležnost za praćenje naplate takse i
  - h) Ostale podatke od značaja za pojedini upravni postupak.

#### Član 10.

- (1) Taksene prijave moraju biti potpune i podnesene u roku.

(2) Prijava za razrez takse iz prethodnog člana čiji je iznos utvrđen za period od 1. godine podnosi se do 31. januara tekuće godine, prema stanju na dan prvog januara tekuće godine za koju se razrez vrši.

(3) Promjene nastale poslije 1. januara tekuće godine, odnosno u toku godine, takseni obveznik dužan je prijaviti najkasnije u roku od 15 dana od dana nastanka promjene.

(4) Rok za prijavu taksa je 3 dana prije početka korištenja predmeta, prostora ili usluga za čije je korištenje propisano plaćanje takse.

(5) Ako obveznik uplate takse ne podnese prijavu u roku propisanom prethodnim stavom, nadležni organ iz ove Odluke će po službenoj dužnosti donijeti rješenje, odnosno prijavu u ime taksenog obveznika, kojim će se utvrditi obaveza plaćanja takse

(6) Fizičke i pravne osobe koje u toku godine u smislu odredaba ove Odluke postanu obveznici takse, plaćaju taksu u iznosu koji je srazmjeran vremenu od dana nastanka taksene obveze do kraja tekuće godine.

#### Član 11.

Služba za razvoj, poduzetništvo i resurse i inspeksijski organi /kantonalni i općinski/, dužni su mjesečno Poreznoj upravi dostavljati podatke, odobrenja i informacije o korištenju predmeta, prostora i usluga od značaja za evidentiranje, razrez i naplatu takse.

#### Član 12.

(1) Rokovi za plaćanje takse su:

a) za istaknutu firmu, priređivanje zabavnih igara i igara na sreću, taksa se plaća godišnje unaprijed (početkom kalendarske godine za poslovnu godinu) podnošenjem prijave o utvrđivanju i naplati takse, najkasnije do 30.04. tekuće godine.

b) za organiziranje i držanje muzike uživo, u ugostiteljskim objektima, taksa se plaća prilikom podnošenja zahtjeva Službi za razvoj, poduzetništvo i resurse Općine Sanski Most za izdavanje rješenja.

c) za korištenje uređaja za pružanje usluga mobilne telefonije, korištenje elektro energetske objekata kojima se vrši prenos električne energije, korištenje podzemnih i nadzemnih kablovskih instalacija u svrhu prenosa signala, podataka, električne energije i slično i korištenje uređaja za pružanje usluga kablovske televizije i bežičnog interneta taksa se uplaćuje u roku propisanom rješenjem kojim je utvrđena obaveza plaćanja takse.

(2) Ako taksa ne bude naplaćena u roku propisanom rješenjem iz prethodnog stava rješenje se izvršava u skladu sa odredbama Zakona o upravnom postupku Federacije Bosne i Hercegovine.

#### Član 13.

Obveznici takse za korištenje predmeta, prostora ili pružanje usluga dužni su nadležnom organu u postupku izdavanja odobrenja za korištenje predmeta, prostora ili usluga za čije je korištenje propisana taksa ovom Odlukom priložiti ovjerenu kopiju taksene prijave.

### III POVRAT TAKSE

#### Član 14.

- (1) Lice koje je platilo taksu po odredbama ove Odluke, a nije bilo dužno da plati, kao i lice koje je platilo iznos veći od propisanog iznosa takse ima pravo na povrat sredstava na osnovu zahtjeva koji podnosi Poreznoj upravi, odnosno Službi za razvoj, poduzetništvo i resurse Općine Sanski Most.
- (2) Porezna uprava odnosno nadležna općinska služba će po osnovu zahtjeva iz stava 1. ovog člana donijeti rješenje u roku od 15 dana po primitku zahtjeva za povrat sredstava.

#### Član 15.

U dijelu razrezi taksi, naplate, zastare, povrata i ostalih radnji koje nisu posebno regulisane ovom Odlukom primjenjivat će se odredbe Zakona o poreznoj upravi Federacije BiH.

### IV OSLOBAĐANJE OD PLAĆANJA TAKSE

#### Član 16.

(1) Od plaćanja takse oslobođeni su:

a) organi i tijela državne, federalne, kantonalne i općinske vlasti;

b) poljoprivredni proizvođači i obrtnici koji obavljaju djelatnosti utvrđene Uredbom o zaštiti tradicionalnih i starih zanata ("Službene novine FBiH, br. 28/22);

c) javne ustanove iz oblasti: obrazovanja, nauke, kulture, zaštite kulturne i prirodne baštine, sporta, zdravstva, veterinarstva, socijalne zaštite, humanitarne, vjerske i dobrotvorne organizacije za ostvarivanje ciljeva iz osnovne djelatnosti za koje su registrovane, te javna preduzeća čiji je osnivač Općina.

d) organizacije ratnih vojnih invalida, porodica šehida i poginulih boraca, organizacije demobilisanih boraca i civilnih žrtava rata, te udruženja logoraša i patriotska liga za ostvarivanje ciljeva iz osnovne djelatnosti za koje su registrovani;

e) privredna društva za zapošljavanje lica sa invaliditetom i zaštitna radionica.

#### Član 17.

(1) Pored oslobađanja iz člana 16. ove Odluke, od obaveze plaćanja takse za istaknutu firmu oslobađaju se fizička i pravna lica koja registruju proizvodne djelatnosti i to:

a) za prve dvije godine poslovanja 100% taksene obaveze;

b) za treću godine poslovanja 50% od ukupnog iznosa taksene obaveze;

(2) Oslobađanje plaćanja takse iz stava (1) odnosi se i na novosnovane poslovne jedinice koje se bave proizvodnom djelatnošću.

## V NAČIN UTVRĐIVANJA VISINE KOMUNALNE TAKSE

### Član 18.

(1) U postupku utvrđivanja visine takse na području općine Sanski Most, kao opći kriteriji uzimaju se :

- a) zone u kojima se koriste predmeti, prostori ili pružaju usluge,
- b) metar dužni za instalacije
- c) veličina pravnog subjekta u skladu sa odredbama Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 15/21)

(2) Područje općine Sanski Most shodno stavu 1.tačka a) dijeli se na šest zona, u skladu sa Odlukom o građevinskom zemljištu ("Službeni glasnik Općine Sanski Most", br. 3/03, 6/09, 3/13), i to:

#### I ZONA

- Trg Oslobođenih (L-35), Prijedorska ulica (L-80) od Trga Oslobođenih (L- 35) do ulice Alekse Šantića (L-82),
- Trg Ljiljana (D-56), Ulica 1. marta (D-55) od Trga Ljiljana do raskrsnice sa ulicom 10. Oktobra (D-71), ulica "10.oktobra" (D-71), ulica Nerona Mehadžića-Nerke (D-74), Titova ulica (D-78) od Trga Ljiljana do skretanja prema ulici Dursuma Begića (D-81) i Sanska ulica (D-80) od Titove ulice (D-78) do rijeke Sane.

#### II ZONA

- Prijedorska ulica (L-80) od ulice Alekse Šantića (L-82) do raskrsnice sa Bulevarom V Korpusa;
- naselje između: Lolinog sokaka (L-86), Bulevar VII korpusa, ulice Hamdije Kreševljakovića (L-74 novoplanirana ulica) i prve zone, nastavlja se Prijedorskom ulicom (L-80) od ulice Alekse Šantića (L-82) do Lolinog sokaka (L-86);
- ulica Hasana Kikića(L-64) od Prijedorske ulice (L-80) do raskrsnice sa ulicom Hasan-bega Čekića (L-65);
- ulica Gojka Bjelca starog (L-60) od Prijedorske ulice (L-80) do skretanja prema Omladinskoj ulici (L-63) do skretanja prema ulici Vladimira Nazora (L-61) i ulica Vladimira Nazora (L-61) od Omladinske ulice (L-63) do ulice Hasana Kikića (L-64);
- ulica Civilnih žrtava rata (L-36) od Trga Oslobođenih do skretanja prema Šabića sokaku (L-27);
- Hamzibegova ulica (L-2) i ulica 25. Novembra (L-4) od Trga Oslobođenih do kraja pijace;
- naselje između: Željezničke ulice (D-84), Bulevara VII Korpusa, ulice Srđana Aleksića (D-65), ulice Safet-Bega Bašagića (D-67) i prve zone;

#### III ZONA

- ostali dijelovi grada u užem urbanom području,
- naselja u širem urbanom području za koja su doneseni Regulacioni planovi,
- područja posebne namjene za koja su doneseni Regulacioni planovi.

#### IV ZONA

- naselje u širem urbanom području grada na lokalitetu "Šejkovača".

#### V ZONA

- ostali dijelovi grada u širem urbanom području

## VI ZONA

-dijelovi naseljenih mjesta na području općine Sanski Most, osim područja za koja su doneseni regulacioni planovi.

## VI TARIFE KOMUNALNIH TAKSA

### Član 19.

#### Tarifa br.1 (istaknuta firma)

(1) Za svaku istaknutu firmu, oznaku, obilježje ili natpis na poslovnim i ostalim prostorijama, objektima i mjestima kojima se označava da određeno pravno ili fizičko lice obavlja izvjesnu djelatnost ili zanimanje, plaća se godišnja taksa.

(2) Mjerilo za utvrđivanje visine komunalne takse na istaknutu firmu su: koeficijent položajne pogodnosti, zona u kojoj je firma istaknuta i veličina pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 15/21).

(3) Pod pogodnošću podrazumijeva se obim i stepen izgrađenosti i uređenosti i položaja zemljišta komunalnim građevinama i instalacijama, saobraćajne povezanosti, vrste i kapaciteta objekta za svakodnevno i periodično snabdijevanje, stepena pokrivenosti naselja objektima za zdravstvo, obrazovanje i kulturu i prirodnih uslova.

(4) Koeficijent položajne pogodnosti određen je jedinstveno za sva pravna i fizička lica tarifnog broja 1. Tarife za istaknutu firmu, po zonama urbanog dijela općine Sanski Most u zavisnosti od pripadnosti određenog poslovnog prostora na kome je istaknuta firma u skladu sa Odlukom o građevinskom zemljištu ("Službeni glasnik Općine Sanski Most", br. 3/03, 6/09, 3/13)

(5) **Visina komunalne takse** na istaknutu firmu za:

- pravna lica (Tpl) određuje se množenjem jedinstvene osnovice komunalne takse na istaknutu firmu (Os) sa koeficijentom položajne pogodnosti (Kpp) i koeficijentom veličine pravnog lica (Kvp) u smislu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 15/21), na način:

$$T_{pl} = O_s \times K_{pp} \times K_{vp}$$

- fizička lica (To) određuje se množenjem jedinstvene osnovice komunalne takse (Os) sa koeficijentom položajne pogodnosti (Kpp), na način:

$$T_o = O_s \times K_{pp}$$

**Osnovica komunalne takse (Os)** na istaknutu firmu je jedinstvena i iznosi 200,00 KM.

**Koeficijent položajne pogodnosti (Kpp)** po zonama utvrđuje se na slijedeći način:

Zone u skladu sa Odlukom o građevinskom zemljištu Općine Sanski Most (Službeni glasnik općine Sanski Most, br. 3/03, 6/09, 3/13)	I	II	III	IV	V	VI
<b>Koeficijent položajne pogodnosti po zonama (Kpp)</b>	1,50	1,40	1,30	1,20	1,10	1,00

Koeficijent **veličine pravnog lica** utvrđuje se na osnovu člana 5. Zakona o računovodstvu i reviziji Federacije BiH ("Službene novine FBiH", br. 15/21). Prema odredbama ovog zakona, pravna lica razvrstavaju se na:

- **Mikro pravna lica** – koja na dan sačinjavanja finansijskih izvještaja ne prelaze granične vrijednosti najmanje dva od slijedećih kriterija:
  - a) Prosječna vrijednost poslovne imovine na kraju poslovne godine je do 350.000,00 KM
  - b) Ukupan godišnji prihod je do 700.000,00 KM
  - c) Prosječan broj zaposlenih u godini za koju se podnosi izvještaj je do 9.
  
- **Mala pravna lica** – koja na dan sačinjavanja finansijskih izvještaja ne prelaze granične vrijednosti najmanje dva od slijedećih kriterija:
  - a) Prosječna vrijednost poslovne imovine na kraju poslovne godine je do 4.000.000,00 KM
  - b) Ukupan godišnji prihod je do 8.000.000,00 KM
  - c) Prosječan broj zaposlenih u godini za koju se podnosi izvještaj je do 49.
  
- **Srednja pravna lica** – koja na dan sačinjavanja finansijskih izvještaja prelaze dva kriterija iz stava za mala pravna lica, ali ne prelaze granične vrijednosti najmanje dva od slijedećih kriterija:
  - a) Prosječna vrijednost poslovne imovine na kraju poslovne godine je do 20.000.000,00 KM
  - b) Ukupan godišnji prihod je do 40.000.000,00 KM
  - c) Prosječan broj zaposlenih u godini za koju se podnosi izvještaj je do 249.
  
- **Velika pravna lica** – koja na dan sačinjavanja finansijskih izvještaja prelaze granične vrijednosti najmanje dva od slijedećih kriterija:
  - a) Prosječna vrijednost poslovne imovine na kraju poslovne godine je do 20.000.000,00 KM
  - b) Ukupan godišnji prihod je do 40.000.000,00 KM
  - c) Prosječan broj zaposlenih u godini za koju se podnosi izvještaj je 249.

Velikim pravnim licima, neovisno od gore navedenih kriterija, shodno članu 5., stav 8. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 15/21), smatraju se banke, mikrokreditna društva, društva za osiguranje i reosiguranje, lizing društva, društva za faktoring, društva za upravljanje investicijskim fondovima, društva za upravljanje dobrovoljnim penzijskim fondovima, berze, brokersko-dilerska društva i druge finansijske organizacije.

Za subjekte čije se sjedište nalazi van Općine Sanski Most, kriterij veličine pravnog lica utvrđuje se prema sjedištu osnovnog poslovnog subjekta.

**Koeficijent veličine pravnog lica (Kvp)** utvrđuje se na osnovu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 15/21), kako slijedi:

Veličina pravnog lica prema Zakonu o računovodstvu i reviziji FBiH	Koeficijent veličine pravnog lica (Kvp)
Mikro preduzeća	2
Mala preduzeća	5
Srednja preduzeća	8
Velika preduzeća	10

- (6) Ako se pod istaknutom firmom obavlja više djelatnosti za koje je propisana različita taksa, naknada se utvrđuje i plaća za djelatnost za koju je propisana najviša taksa.
- (7) Ako se firma ističe u drugom polugodištu, taksa se razrezuje i plaća u iznosu od 50% od propisane.
- (8) Ako se poslovni objekt ili prostor nalazi na granici poslovnih zona, taksa na istaknutu firmu plaća se prema zoni kojoj pripada ulica na kojoj je istaknuta firma, odnosno prema zoni na kojoj je poslovni objekat više orijentiran.

**Tarifa broj 2.**  
**(priređivanje zabavnih igara i igara na sreću)**

(1) Za držanje, odnosno korištenje sredstava za igru u objektima registriranim za priređivanje zabavnih igara i igara na sreću, u ugostiteljskim i ostalim objektima kojima priređivanje zabavnih igara nije osnovna djelatnost, plaća se godišnje po jednom komadu, odnosno predmetu i aparatu :

a) na bilijar stolove, flipere, video igre, automate, pikado i druga sredstva za igre gdje je dobitak isključivo u određenom broju igara - 300,00 KM

b) na aparate koji donose novac - 1.000,00 KM

(2) Pod aparatima koji donose novac podrazumijevaju se elektronski ili mehanički aparati koji tokom igre omogućavaju igraču dobitak u novcu ili žetonima koji su naplativi u novcu.

**Tarifa broj 3.**  
**(organizovanje i držanje žive muzike u ugostiteljskim i drugim objektima)**

(1) Za držanje muzike uživo plaća se taksa dnevno, u zavisnosti prema mjestu držanja muzike:

- a) Hotel, motel, noćni klub i svadbeni salon – 250,00 KM
- b) Ostali ugostiteljski objekti preko 100 m<sup>2</sup> korisne površine – 150,00 KM
- c) Ostali ugostiteljski objekti do 100 m<sup>2</sup> korisne površine, pizzeria, bistro i slastičarna – 50,00 KM
- d) Držanje muzike na otvorenom prostoru koji nije registriran za ugostiteljsku djelatnost (svadbe, šatori, koride i sl.) – 200,00 KM.

(2) Za držanje muzike uživo u sklopu manifestacija koje su pod pokroviteljstvom Općine Sanski Most, ili koje za svoje održavanje imaju saglasnost izdatu od strane Općine Sanski Most taksa iz stava 1. ovog člana se ne naplaćuje.

**Tarifa broj 4.**  
**(korištenje uređaja za pružanje usluga mobilne telefonije)**

Obračun komunalne takse se vrši po jedinici mjere/komadu za sve građevinske zone u jednakom iznosu u kojima je uređaj instaliran od strane mobilnog operatera, na svakoj pojedinačnoj lokaciji, na području općine Sanski Most:

Red. br.	Vrsta uređaja / opreme	Iznos takse
1.	Bazna stanica mobilne telefonije (KM po komadu godišnje)	10.000,00
2.	Mikrobazna stanica mobilne telefonije (KM po komadu godišnje)	5.000,00

3.	Predajnici (pasivni repetitori) (KM po komadu godišnje)	2.000,00
4.	Antene i stubovi (KM po komadu godišnje)	1.500,00

#### Tarifa broj 5.

#### (korištenje elektro energetske objekata kojima se vrši prenos električne energije)

Obračun komunalne takse se vrši po jedinici mjere/komadu za sve građevinske zone u jednakom iznosu u kojima je uređaj instaliran od strane pravnog lica koje vrši prenos električne energije, na svakoj pojedinačnoj lokaciji, na području općine Sanski Most.

Red. br.	Vrsta uređaja / opreme	Iznos takse
1.	Trafostanice 110/20/35 kV (KM po komadu godišnje)	20.000,00
2.	Trafostanice 110/20/10 kV (KM po komadu godišnje)	15.000,00
3.	Trafostanice 35/(20) 10/0,4 kV (KM po komadu godišnje)	3.000,00
4.	Trafostanice 10(20) 0,4 kV (KM po komadu godišnje)	1.000,00
5.	Stubne trafostanice	600,00

#### Tarifa broj 6.

#### (korištenje podzemnih i nadzemnih kablovskih instalacija u svrhu prenosa signala, podataka, električne energije i slično)

Obračun komunalne takse za korištenje podzemnih i nadzemnih kablovskih instalacija u svrhu prenosa signala, podataka, električne energije i slično vrši se po jednom metru dužine kablovskog voda na području općine Sanski Most po cijeni od 0,20 KM/m<sup>1</sup>.

#### Tarifa broj 7.

#### (korištenje uređaja za pružanje usluga kablovske televizije i bežičnog interneta)

Obračun komunalne takse se vrši po jedinici mjere/komadu za sve građevinske zone u jednakom iznosu u kojoj je uređaj instaliran od strane operatera, na svakoj pojedinačnoj lokaciji, na području općine Sanski Most.

Red. br.	Vrsta uređaja / opreme	Iznos takse
1.	Bazna stanica za bežični internet (KM po komadu godišnje)	4.000,00
2.	Mikrobazna stanica za bežični internet (KM po komadu godišnje)	2.000,00
3.	Predajnici (pasivni repetitori) (KM po komadu godišnje)	1.400,00
4.	Antene i stubovi (KM po komadu godišnje)	1.400,00
5.	Postavljanje kablovske televizije (KM po svakom korisniku godišnje)	12,00
6.	Za korištenje stubova ulične rasvjete u vlasništvu općine Sanski Most, a koji se koriste za potrebe kablovske televizije (KM po svakom stubu godišnje)	10,00

## VII NADZOR

### Član 20.

Upravni nadzor nad provođenjem ove Odluke vrši Općinska služba za razvoj, poduzetništvo i resurse, a inspekcijski nadzor vrši Kantonalna uprava za inspekcijske poslove i Općinska služba za inspekcijske poslove, kao i Porezna uprava i PU Sanski Most, svaka u okviru svoje nadležnosti.



## VIII KAZNENE ODREDBE

### Član 21.

(1) Novčanom kaznom u iznosu od 2.000 KM kaznit će se za prekršaj pravno lice ako u roku propisanom ovom Odlukom ne prijavi ili ne plati taksu.

(2) Novčanom kaznom u iznosu od 1.000 KM kaznit će se za prekršaj odgovorno lice u pravnom licu ako u roku propisanom ovom Odlukom ne prijavi ili ne plati taksu.

(3) Novčanom kaznom u iznosu od 1.000 KM kaznit će se za prekršaj fizičko lice ako u roku propisanom ovom Odlukom ne prijavi ili ne plati taksu.

## IX PRELAZNE I ZAVRŠNE ODREDBE

### Član 22.

(1) Stupanjem na snagu ove Odluke van snage se stavlja Odluka o komunalnim taksama i tarifi komunalnih taksa ("Službeni glasnik Općine Sanski Most", br. 3/19), Zaključak o ispravci greške u Odluci o komunalnim taksama i tarifi komunalnih taksa ("Službeni glasnik Općine Sanski Most", br. 2/20) i Odluka o izmjenama i dopunama Odluke o komunalnim taksama i tarifi komunalnih taksa ("Službeni glasnik Općine Sanski Most", br. 9/21).

(2) Svi započeti a nezavršeni predmeti završit će se po odredbama ove Odluke.

### Član 23.

Odluka stupa na snagu 8 (osam) dana od dana objave u Službenom glasniku Općine Sanski Most.

Broj:01-\_\_\_\_\_/22

Predsjedavajuća Općinskog vijeća

Sanski Most, \_\_. \_\_. 2022. godine

dr. Nada Elijaš

Na osnovu člana 24. Statuta općine Sanski Most ("Službeni glasnik općine Sanski Most", broj: 4/08, 5/08, 5/09, 2/10 i 9/11) i člana 124. Poslovnika o radu Općinskog vijeća Sanski Most ("Službeni glasnik općine Sanski Most", broj: 4/17,7/20, 06/22, 10/22 i 11/22) Općinsko vijeće Sanski Most 19. sjednici održanoj dana 27.10.2022 godine, razmatralo je Informaciju o ostvarenju godišnjeg plana implementacije Strategije lokalnog razvoja općine Sanski Most za 2021.godinu- Izvještaj o razvoju, te nakon rasprave donijelo:

## ZAKLJUČAK

### Član 1.

Prima se k znanju Informacija o ostvarenju godišnjeg plana implementacije Strategije lokalnog razvoja općine Sanski Most za 2021.godinu- Izvještaj o razvoju.

### Član 2.

Ovaj zaključak stupa na snagu danom donošenja i bit će objavljen u "Službenom glasniku Općine Sanski Most".

Broj: 01-02-329/22  
Datum:28.10.2022.godine

PREDSJEDAVAJUĆA  
OPĆINSKOG VIJEĆA  
dr.Nada Elijaš, s.r.

Na osnovu člana 24. i 112. Statuta općine Sanski Most ("Službeni glasnik općine Sanski Most", broj: 04/08, 05/08, 05/09, 02/10 i 09/11) Općinsko vijeće Sanski Most, na 19. sjednici Općinskog vijeća, održanoj dana 27.10.2022.godine, usvojilo je:

## **PLATFORMU ZA MIR**

Općinsko vijeće Sanski Most,

Poštujući političko-pravni poredak u Bosni i Hercegovini;

Duboko privrženi izgradnji i unapređenju mirnog i pravednog društva;

Svjesni važnosti uspostavljanja i promocije mira u postkonfliktnim multietničkim društvima;

Zabrinuti zbog nadmoći suprotstavljenih kulturnih narativa i iskorištavanja razlika i historijske patnje, što je doprinijelo netoleranciji i nasilju u Bosni i Hercegovini;

Sa zabrinutošću posmatrajući nedostatak alternativnih ili neutralnih interpretacija historije i nedostatak snažne demokratske i participativne političke kulture;

Uvjereni da su vlasti na svim nivoima, od lokalne zajednice do vrha države, javne institucije, nevladine organizacije, institucije obrazovanja, kulture, sporta, mediji, mladi, vjerske zajednice, intelektualci, a posebno ranjive i marginalizirane grupe od neprocjenjive važnosti za izgradnju interkulturalnog razumijevanja, mira i nenasilja, te obnovu međuetničkog povjerenja narušenog posljednjim ratnim sukobom u regiji i teškim posljedicama koje je izazvao;

Ohrabreni dosadašnjim postignutim rezultatima mirovnih napora i zajedničkih projekata vladinog i nevladinog sektora, a posebno konkretnim i već vidljivim rezultatima projekata, kao što su „Izaberimo mir zajedno“, „PRO-Budućnost“ i ostali;

Žaleći zbog izostanka edukacije o miru u podijeljenom obrazovnom sistemu BiH, te marginalizaciji onih koji pokušavaju srušiti barijere nepovjerenja i straha;

Afirmirajući potrebu da vlasti i pojedinci sa svih nivoa i segmenata društva - javne institucije, nevladine organizacije, obrazovne i kulturne institucije, sportska udruženja, mediji, vjerske zajednice, intelektualci, mladi, te ranjive i marginalizirane grupe - učestvuju u izgradnji interkulturalnog razumijevanja, međuetničkog povjerenja, mira i nenasilja;

Prepoznajući predanost pojedinaca i institucija širom BiH, koji su hrabro inicirali proces prevazilaženja posljedica proteklog rata i ponovne izgradnje međusobnog razumijevanja, poštovanja i povjerenja;

Ohrabreni rezultatima napora na izgradnji mira i zajedničkim projektima navedenih pojedinaca i institucija;

Nastojeći postići:

- Sveobuhvatno zagovaranje za procese izgradnje mira i pomirenja, te njihovo prihvatanje među svim konstitutivnim i ostalim narodima, građanima i vjerskim zajednicama u BiH;
- Međusobno povjerenje, razumijevanje i odgovornost u svim društvenim sferama;

- Uključivanje u procese izgradnje mira svih onih koji mogu doprinijeti uspostavi boljih društvenih uslova i kapaciteta koji će poboljšati stabilnost, sigurnost i mir;
- Podizanje svijesti građana i stvaranje kulture dijaloga u kojoj će građani moći saznati za postojanje drugačijih interpretacija društvenih odnosa i odgovornosti, bez uticaja štetnih ili ideologija podjele;
- Eliminiranje komunikacijskih prepreka među donosiocima odluka i aktivistima civilnog društva, kako bi mogli zajednički raditi na izgradnji dugoročnih i održivih mirovnih procesa;
- Dinamičnije i brže uključivanje vlasti u mirovne aktivnosti civilnog društva i nevladinog sektora i obrnuto;
- Identificiranje predstavnika svih nivoa i sfera društva - političara, vjerskih vođa, građanskih aktivista, predstavnika manjina, intelektualaca, aktivista u obrazovanju, novinara, mladih, žrtava rata, marginaliziranih grupa i drugih - koji su spremni transformirati svoju sklonost mirovnim nastojanjima u konkretne aktivnosti koje afirmiraju ljudska prava i poboljšavaju međusobno povjerenje, razumijevanje i odgovornost;
- Prepoznavanje pojedinačnih i institucionalnih aktera koji teže da umanje distancu među narodima i eliminiraju predrasude prema "drugima", na taj način kultivirajući društvene stavove o međusobnom razumijevanju, međuetničkom povjerenju i interkulturalnom razvoju;
- Prihvatanje ove platforme na državnom, entitetskom i lokalnom nivou;
- Adaptaciju ove platforme za regionalnu i međunarodnu javnost, radi uvjeravanja susjednih država i regionalnih i međunarodnih organizacija u neophodnost nastavka podrške izgradnji mira u BiH;

Afirmirajući našu uvjerenost da je mir, kao ljudsko pravo, najveća vrijednost našeg društva;

Iskazujući našu uvjerenost u neophodnost široke promocije i prihvatanja mira i mirovnih aktivnosti kao jedinog puta za prevenciju ponovnog buđenja konflikta i nasilja;

Naglašavajući da je naš zajednički cilj mir, koji će biti inkluzivan, te da nećemo biti zadovoljni samo odsustvom rata i nasilja, nego mirom koji će graditi slobodu, pravdu, razumijevanje i odgovornost kroz zaštitu ljudskih, nacionalnih i manjinskih prava;

Prihvatajući vlastitu odgovornost za stvaranje društva u kojem će mir biti prioritet iznad svih ostalih;

Riješeni da nastavimo podržavati već postojeće napore mirovnih aktivista u BiH, te da prepoznamo doprinos mirovnih aktivista našem društvu;

Zajedno posvećeni javnom zagovaranju za mir i kontinuiranom radu i obrazovanju drugih o miru;

Posvećeni razvoju demokratske slobode, građanskog angažmana i demokratske političke kulture koja ohrabruje debatu, odbacuje nasilje i promovira nenasilne oblike suprotstavljanja;

Pozivajući na širenje debata o miru u medijima i na društvenim platformama, kako bi one postale dio svakodnevnog života;

Osuđujući sve aktere i zagovarače nasilja i nasilnih politika;

Pozivajući sve donosiocce odluka i vođe civilnog društva širom zemlje i na različitim nivoima političke strukture da promoviraju vrijednosti mira i aktivno učestvuju u izgradnji stabilnog i održivog mira u BiH;

Podržavajući uspostavljanje komiteta čiji će članovi biti prominentne i javne osobe iz različitih sfera (obrazovanje, ekonomija, vjera, donositelji odluka, politika, kultura, sport, itd.) koje će zagovarati da svi građani BiH ovu platformu prihvate kao svoju;

Promovirajući uključivanje formalne i neformalne edukacije za mir u javnim obrazovnim ustanovama;

Iskazujući predanost u radu s medijima, kako bi se pronalazile i promovirale najbolje mirovne prakse, poruke, simboli i geste;

Pozivajući na javno predstavljanje zaključaka i naučenih lekcija relevantnih naučnih istraživanja usredotočenih na projekte izgradnje mira;

Pozivajući na izradu strategije za održiv dugotrajni mir u Bosni i Hercegovini, sveobuhvatnog mirovnog okvira koji će trasirati put za institucionalizaciju procesa izgradnje povjerenja i pomirenja u BiH;

Zalažući se za identificiranje pojedinaca iz sudske i izvršne vlasti koji ohrabruju mir, međuetničku saradnju i razumijevanje, a koje poštuju različite zajednice, kako bi mogli doprinijeti izradi i parlamentarnoj ratifikaciji strategije za održiv dugotrajni mir u BiH;

Pozivajući načelnike općina i gradova da otvore svoja vrata svim ljudima, te da promoviraju političku otvorenost, toleranciju, dijalog, prihvatanje postojanja drugačijih narativa, te zagovaranje dugotrajnog mira i pomirenja u svim lokalnim zajednicama;

Ohrabrujući sve ljude u BiH da učestvuju u formalnoj i neformalnoj mirovnoj edukaciji, izgradnji vještina za očuvanje mira, te rješavanju konflikata na miran i nenasilan način;

Pozivajući vladin i nevladin sektor u BiH, te sve građane da dostave kvalitetne prijedloge koji će poboljšati ovu početnu platformu, kako bi ona mogla prerasti u relevantan dokument i standard za mirovni aktivizam u BiH;

U potpunosti podržavamo sadržaj ove platforme i posvećujemo se ostvarivanju navedenih ciljeva.

Broj: 01-02-330/22  
Datum: 28.10.2022. godine

PREDSJEDAVAJUĆA  
OPĆINSKOG VIJEĆA  
dr. Nada Elijaš, s.r.

Na osnovu člana 24. i 112. Statuta općine Sanski Most ("Službeni glasnik općine Sanski Most", broj: 04/08, 05/08, 05/09, 02/10 i 09/11) Općinsko vijeće Sanski Most, na 19. sjednici Općinskog vijeća, održanoj dana 27.10.2022.godine, usvojilo je:

### **PLAN AKTIVNOSTI za implementaciju Platforme za mir 2022. - 2023. godine**

Platforma za Mir (u nastavku: Platforma) je okvirni i deklarativni dokument, koji ističe mir kao jednu od temeljnih i najvećih vrijednosti Bosne i Hercegovine (BiH), njenih naroda i građana.

Predsjedavajuća općinskog vijeća je saglasna i opredijeljena da Platforma i odredbe proistekle iz nje posluže kao temelj, ne samo u smislu izgradnje povjerenja i osnaživanja procesa pomirenja među narodima u našoj zemlji, nego i kao okvir za poduzimanje konkretnih aktivnosti, za koje će se potpisnik ovog dokumenta opredijeliti.

Predsjedavajuća općinskog vijeća će nastojati osigurati predlaganje, donošenje i implementaciju formalnih odluka, koje će omogućiti i osigurati provođenje relevantnih odredbi iz Platforme na nivou općine/opštine. Takve odluke će, posljedično, osigurati političku i resursnu podršku za općinske načelnike i gradonačelnike i članove općinskog vijeća koji, temeljem tih odluka, mogu i žele preuzeti vodeću ulogu u procesima izgradnje mira i pomirenja u njihovim lokalnim zajednicama.

U skladu sa predloženim osnovnim ciljem u razdoblju 2022.-2023. Predsjedavajući općinskog vijeća planira sljedeće aktivnosti:

- Usvajanje Platforme za mir od strane Općinskog vijeća Sanski Most;
- Potpisivanje Platforme za mir u ime Općinskog vijeća Sanski Most;
- Uključivanje u radni plan i budžet opštine aktivnosti koje podstiču izgradnju mira i pomirenje;
- Učešće predstavnika Općinskog vijeća u zajedničkoj, multi-etničkoj posjeti mjesta stradanja civilnih žrtava rata unutar općine ( Sasina, Kriva cesta, Krinks, Keramika i druga mjesta stradanja);
- Učešće predstavnika Općinskog vijeća na multi-etničkim događajima koji za cilj imaju da promovišu izgradnju mira i pomirenje u drugim općinama;
- Održavanje tematske sjednice posvećene izgradnji mira, pomirenju, toleranciji i ljudskim pravima u 2023. godini;
- Javno učešće predstavnika Općinskog vijeća na drugim događajima koji za cilj imaju izgradnju mira i pomirenja;
- Druge aktivnosti, a kako slijedi:
  - pružanje podrške Udruženju CIM za održavanje „SEDMICE MIRA“ u Sanskom Mostu,
  - pružanje podrške horu „HARMONIJA“ u održavanju Bajramskog, Božićnjeg i novogodišnjeg koncerta,
  - pružanje podrške kampanji „DJELUJMO ZAJEDNO“ u organizaciji Udruženja osoba sa invaliditetom koji se organizuje u Sanskom Mostu;
- Izgradnja cjevovoda (međuentitetski projekat) Sanski Most - Oštra Luka,
- Općina Sanski Most je spremna da u slučaju prirodnih i drugih nesreća pruži svaku vrstu pomoći ugroženim općinama i gradovima u BiH.

Broj: 01-02- 331/22  
Datum: 28.10.2022. godine

PREDSJEDAVAJUĆA  
OPĆINSKOG VIJEĆA  
dr. Nada Elijaš,s.r.

Na osnovu člana 24. Statuta općine Sanski Most ("Službeni glasnik općine Sanski Most", broj: 4/08, 05/08, 5/09, 2/10 i 9/11), člana 33. stav (2), člana 34. i 35. Poslovnika o radu Općinskog vijeća ("Službeni glasnik općine Sanski Most", broj: 04/17, 7/20, 7/21, 6/22, 11/22), Predsjedavajuća Općinskog vijeća donosi:

## R J E Š E N J E

o osnivanju Kolegija Općinskog vijeća Sanski Most

I

Ovim Rješenjem osniva se Kolegij Općinskog vijeća, utvrđuje se njegov broj, sastav, djelokrug rada i naknada za rad.

II

U Kolegij Općinskog vijeća imenuju se:

1. Nada Elijaš, predsjedavajuća Općinskog vijeća Sanski Most;
2. Sanel Mahić, zamjenik predsjedavajuće Općinskog vijeća Sanski Most;
3. Armin Islamović, predsjednik Kluba vijećnika SDA;
4. Edvin Trožić, predsjednik Kluba vijećnika SDP;
5. Nirzad Karamujić, predsjednik Kluba vijećnika NES-a;
6. Dedo Kvrgić, predsjednik Kluba vijećnika NiP-a;
7. Selvir Korlat, vijećnik SBB;
8. Nađa Nukić, vijećnica Naše stranke;
9. Amir Islamčević, vijećnik Narodnog pokreta;
10. Faris Hasanbegović, načelnik Općine Sanski Most.

III

U okviru svojih prava i dužnosti Kolegij vrši sljedeće poslove:

- a) utvrđuje prijedlog Programa rada Vijeća i radnih tijela Vijeća;
- b) stara se o ostvarivanju prava i dužnosti vijećnika u obavljanju njihovih dužnosti;
- c) osigurava saradnju sa klubovima vijećnika i između njih;
- d) koordinira rad radnih tijela Vijeća i saradnju Vijeća i njegovih radnih tijela;
- e) osigurava saradnju Vijeća i općinskog organa uprave;
- f) koordinira aktivnosti u pripremama sjednica Vijeća i utvrđivanju dnevnog reda na tim sjednicama, te utvrđuje prijedlog dnevnog reda za sjednice Vijeća;
- g) prati izvršavanje odluka i zaključaka Vijeća;
- h) prati izvršavanje Programa rada Vijeća ;
- i) razmatra inicijative i prijedloge upućene Vijeću.

IV

Članovi Kolegija za obavljanje svoga rada imaju pravo na naknadu utvrđenu Odlukom o utvrđivanju visine naknade vijećnicima i članovima komisija u Općinskom vijeću Sanski Most.

V

Ovim rješenjem se stavlja van snage rješenje broj: 01-04-287/22 od 31.08.2022.godine.

VI

Ovo Rješenje stupa na snagu danom donošenja i bit će objavljeno u "Službenom glasniku Općine Sanski Most".

Broj: 01-04-314/22  
Datum: 27.09.2022.godine

Predsjedavajuća Općinskog vijeća  
dr. Nada Elijaš



Na osnovu člana 24. Statuta općine Sanski Most ("Službeni glasnik općine Sanski Most", broj: 4/08,05/08,5/09,2/10 i 9/11), člana 33. stav (2), člana 34. i 35. Poslovnika o radu Općinskog vijeća ("Službeni glasnik općine Sanski Most", broj: 04/17, 7/20, 7/21, 6/22, 11/22), Predsjedavajuća Općinskog vijeća donosi:

**R J E Š E N J E**  
o izmjeni Rješenja o osnivanju Kolegija Općinskog vijeća Sanski Most

I

U Rješenju o osnivanju Kolegija Općinskog vijeća, broj: 01-04-314/22 od 27.09.2022.godine, u članu II stav (1) tačka 5. mijenja se i glasi: "Remzija Sadić, predsjednik Kluba vijećnika NES-a".

II

Ovim rješenjem mijenja se rješenje broj: 01-04-314/22 od 27.09.2022.godine.

III

Ovo Rješenje stupa na snagu danom donošenja i bit će objavljeno u "Službenom glasniku Općine Sanski Most".

Broj: 01-04-314-1/22  
Datum: 14.10.2022.godine

Predsjedavajuća Općinskog vijeća  
dr. Nada Elijaš, s.r.

